

Konpè Mangous épi Konpè Mel

« Pawol flatè sé zatrap ! »

An jou bonmaten,

asou an branch friyapen,

Konpè Mel té la ka fè yan lentérésan épi an vié tet pen rasi.

An menm balan-an, konpè mangous ki dòmi san soupé, té ka chèché doukré mété anlè lestonmak-li.

- É, é ! Ki nouvel ou konpè Mel ? Man té la ka di kò-mwen konsa :

- « San manti, pou prélé konpè Mel prélé, si i ka dansé kon'y ka sapé, man paka wè ki moun ki wètè'y isi-a.»

Mésiézédanm, pawol-la tewbolizé lespri konpè Mel. Latè pa té pé sipoté'y ankò.

Misié-a desidé pitjé an mazouk pou montré konpè Mangous, anpami tout dansè, sé li ki pli fò.

Men apré yonndé tounen viré, tet pen an pran lavol.

Konpè Mangous mété lapat anlè'y flap ! Épi i di :

- Kouman konpè Mel, ou pa janmen tann di lè an moun ka flaté'w, sé kouyonnen i ka chèché kouyonnen'w alow ? Enben pou lapenn man bien mérité ti tet pen rasi tala !

Mésiézédanm, Konpè Mel té telman wont, i pa té sav la pou pran. I jiré sa pa kay rivé'y ankò. Men pou fwa-tala, i té za two ta.